



ՍՈՒՐՔ ԶԱԿՈՐ

ԱՌԱՋՆՈՐԴԱՆԻՍԱՏ ՄԱՅՐ ԵՆՆԵՐ

ՅԻՇԱՏԱԿ ԵՊԻԱ ՄԱՐԳԱՐԷԻՆ

11 ՅՈՒՆԻՍ 2017

Կիրակնօրեայ Ընթերցումներ	Էջ 1
Սարկաւագական Ձեռնադրութիւն	Էջ 3
Ծանուցում	Էջ 4

ԸՆԹԵՐՑՈՒՄ ԹԱԳԱԽՈՐՈՒԹԵԱՆՑ ԵՐՐՈՐԴ ԳԻՐՔԷՆ 18.29-46

Կէսօրը անցաւ, եւ Բահաղի մարգարէները շարունակեցին իրենց ցնորական կանչը՝ տուփը մինչեւ երեկոյեան զոհը մատուցանելու ժամը. բայց ո՛չ մէկ ձայն:

Այն ատեն Եղիա Թեսալացի ըսաւ գարշելի այդ կուռքերու մարգարէներուն.

- Հեռացէ՛ք այլեւս, հիմա ես իմ ողջակէզս պիտի մատուցանեմ:

Եւ անոնք հեռու գացին:

Եղիա ժողովուրդին դառնալով ըսաւ. «Ինծի՛ մօտեցէ՛ք»: Եւ ամբողջ ժողովուրդը անոր մօտեցաւ: Եղիա Տիրոջ կործանած սեղանը վերականգնելու համար տասներկու քարեր առաւ, Յակոբի որդիներէն սերած ցեղերուն թիւին համաձայն, որուն Աստուած խօսած էր ըսելով. «Իսրայէլ պիտի կոչուիս», այդ քարերով սեղան մը կանգնեց Տիրոջ անունին, եւ անոր շուրջը փոս մը փորեց, թիթեղ մը սերմնցու տանելու խորութեամբ: Ապա փայտերը սեղանին վրայ շարեց, զուարակը կտոր-կտոր ընելով փայտերուն վրայ դիզեց եւ հրամայեց.

- Չորս սափոր ջուր բերէ՛ք եւ ողջակէզին ու փայտերուն վրայ թափեցէ՛ք:

Ապա ըսաւ. «Կրկնեցէ՛ք նոյնը»: Եւ անոնք նոյն ձեւով կրկնեցին: «Երրորդ անգամ ըլլալով կրկնեցէ՛ք նոյնը», ըսաւ ան, եւ երրորդ անգամ մըն ալ այնպէս ըրին: Զուրը սեղանին շուրջ հոսեցաւ եւ լեցուց փոսը:

Երբ երեկոյեան զոհը մատուցանելու ժամը հասաւ, Եղիա մարգարէ սեղանին մօտեցաւ եւ աղօթեց աղաղակելով.

- Ո՛վ Տէր, Աբրահամի, Իսահակի եւ Յակոբի

Աստուածը, ցո՛յց տուր այսօր թէ դո՛ւն ես Իսրայէլի Աստուածը եւ ես՝ քու ծառադ, եւ թէ քեզի համար ըրի այս բոլորը: Լսէ՛ ինծի, Տէ՛ր, պատասխանէ՛ ինծի կրակով, որպէսզի այս ժողովուրդը գիտնայ թէ դո՛ւն ես Աստուածը, ո՛վ Տէր, եւ դո՛ւն ես որ ետ քեզի կը դարձնես իրենց սիրտը:

Այն ատեն Տէրը երկինքէն կրակ դրկեց, որ այրեց ողջակէզն ու փայտերը, քարերն ու հողը, եւ լափեց փոսին մէջ հաւաքուած ջուրը: Ասիկա տեսնելով՝ ամբողջ ժողովուրդը երեսի վրայ գետին ինկաւ, ըսելով. «Արդարեւ Տէ՛րն է Աստուածը, Տէ՛րն է Աստուածը»:

Եղիա անոնց հրամայեց. «Բռնեցէ՛ք Բահաղի մարգարէները. ոեւէ մէկը ողջ չմնայ»: Եւ ժողովուրդը բռնեց զանոնք: Եղիա զանոնք Կիսոն կոչուած հեղեղատը իջեցուց եւ հոն կոտորեց զանոնք:

Այնուհետեւ Եղիա Աքաաբին ըսաւ. «Գնա՛ հիմա, կե՛ր եւ խմէ՛, որովհետեւ մօտալուտ սաստիկ անձրեւի ձայն կ'առնեմ»: Աքաաբ ուտելու եւ խմելու գնաց, իսկ Եղիան Կարմեղոս լերան գագաթը բարձրացաւ, մինչեւ գետին խոնարհեցաւ ու դէմքը ծունկերուն մէջ առաւ, եւ իր ծառային ըսաւ. «Գնա՛ եւ ծովուն կողմը նայէ՛»: Պատանին գնաց նայեցաւ եւ ըսաւ. «Բան չկայ»:

- Դարձեալ գնա՛, - ըսաւ Եղիա, եւ եօթն անգամ պատանին ետ գնաց: Եօթներորդ անգամին պատանին ըսաւ.

- Ահա մարդու մը ձեռքին չափ փոքրիկ ամպ մը կ'ելլէ ծովէն:

Այն ատեն Եղիա ըսաւ.

- Գնա՛ եւ Ագաաբին ըսէ՛. «Կառքդ լծէ՛ եւ տունդ դարձի՛ր որպէսզի անձրեւի չբռնուիս»:

Շուտով երկինքը ամպերով մթնեցաւ. հով ելաւ եւ սաստիկ անձրեւ սկսաւ: Աքաաբ իր կառքը հեծաւ եւ Յեզրայէլ փուլաց: Տիրոջ զօրութիւնը օգնեց Եղիայի, որ պարեգօտը մէջքին ամրացնելով վազեց եւ Աքաաբէն առաջ մտաւ Յեզրայէլ քաղաքի դռնէն:

**ԸՆԹԵՐՑՈՒՄ
ԹԱԳԱՒՈՐՈՒԹԵԱՆՑ ՉՈՐՐՈՐԴ
ԳԻՐՔԷՆ
2.1-15**

Երբ հասաւ ժամանակը, որ Տէրը մըրիկով երկինք պիտի բարձրացնէր Եղիան, Եղիա եւ Եղիսէ Գաղգաղայէն մեկնեցան: Եղիա Եղիսէին ըսաւ.

- Հո՛ւս մնա, Տէրը զիս Բեթէլ կը ղրկէ:

Եղիսէ պատասխանեց.

- Վկայ ըլլայ ապրող Տէրը. կ'երգնում քու կեանքովդ, թէ պիտի չթողում քեզ:

Բեթէլ եկան: Բեթէլ բնակող մարգարէները խումբով եկան Եղիսէի եւ ըսին.

- Գիտե՞ս, որ Տէրը այսօր քեզմէ պիտի առնէ Եղիան՝ քու տէրդ:

- Գիտեմ, այդ մասին մի՛ խօսիք, - պատասխանեց Եղիսէ:

Ապա Եղիա Եղիսէի ըսաւ.

- Հո՛ւս մնա, Տէրը զիս Երիքով կը ղրկէ:

Եւ ան պատասխանեց.

- Վկայ ըլլայ ապրող Տէրը. կ'երգնում քու կեանքովդ, թէ պիտի չթողում քեզ:

Եւ Երիքով եկան: Երիքով բնակող մարգարէները խումբով մօտեցան Եղիսէի եւ ըսին.

- Գիտե՞ս, որ Տէրը այսօր քեզմէ պիտի առնէ Եղիան՝ քու տէրդ:

- Գիտեմ, մի՛ խօսիք այդ մասին, - պատասխանեց Եղիսէ:

Եղիա Եղիսէի ըսաւ.

- Հո՛ւս մնա, Տէրը զիս Յորդանան կը ղրկէ:

Եղիսէ պատասխանեց.

- Վկայ ըլլայ ապրող Տէրը. կ'երգնում քու կեանքովդ, թէ պիտի չթողում քեզ:

Եւ երկուքը միասին գացին: Մարգարէներու խումբէն յիսուն հոգի հետեւեցան անոնց մինչեւ Յորդանան գետ: Եղիա եւ Եղիսէ գետեզրին կանգ առին, իսկ միւսները կանգնեցան քիչ մը հեռու: Եղիա իր վերարկուն հանեց, ծալեց զայն եւ անով զարկաւ ջուրերուն: Զուրերը այս ու այն կողմ բաժնուեցան, եւ անոնք երկուքով անցան ցամաք տեղէն: Երբ անցան, Եղիա ըսաւ.

- Եղիսէ՛, քանի դեռ հետդ եմ՝ խնդրէ՛ ինչ որ կրնամ ընել քեզի համար:

- Խնդրե՛մ. մարգարէական հոգիէդ կրկին բաժին թող ժառանգեմ, - պատասխանեց Եղիսէ:

- Դժուար բան խնդրեցիր, - ըսաւ Եղիա, - բայց պիտի ստանաս զայն, եթէ տեսնես իմ երկինք բարձրացուիլս. այլապէս պիտի չստանաս:

Եւ մինչ խօսելով կ'երթային, ահա յանկարծ

հրեղէն ձիերով կառք մը իրարմէ բաժնեց Եղիան ու Եղիսէն, եւ Եղիա մըրիկով երկինք բարձրացաւ: Եղիսէ տեսաւ եւ աղաղակեց. «Հա՛յր, հա՛յր, ահա Իսրայէլի կառքն ու հեծեալները»: Եւ այլեւս չտեսաւ զայն: Ուստի քաշեց, պատռեց իր վերարկուն, զայն երկու կտորի վերածելով: Ապա վերցուց Եղիայի վերարկուն, որ իր վրայ ինկաւ, եւ դարձաւ Յորդանան գետին եզերքը: Առաւ Եղիայի վերարկուն եւ ջուրերուն զարկաւ, բայց անոնք չբաժնուեցան: Այն ատեն գոչեց. «Ո՞ւր ես, Տէ՛ր, Եղիայի Աստուածը», եւ դարձեալ ջուրերուն զարկաւ: Զուրերը այս ու այն կողմ բաժնուեցան եւ Եղիսէ անցաւ միւս կողմ: Երբ Երիքովի մարգարէները դիմացէն տեսան զինք, ըսին. «Եղիայի հոգին Եղիսէի վրայ հանգչեցաւ»: Գացին դիմաւորեցին զինք եւ մինչեւ գետին խոնարհեցան անոր առջեւ:

**ՅԱԿՈԲՈՍ ԱՌԱՔԵԱԼԻ
ԸՆԴՀԱՆՐԱԿԱՆ ՆԱՄԱԿԷՆ
5.16-20**

Չեր մեղքերը իրարու խոստովանեցէք եւ իրարու համար աղօթեցէք, որպէսզի բժշկուիք. որովհետեւ արդարի մը աղօթքը ազդեցիկ է եւ մեծապէս կ'օգնէ: Եղիա մեզի նման կիրքերու ենթակայ մարդ էր. բայց երբ աղօթեց որ անձրեւ չգայ երեքուկէս տարի հանձրեւեց երկրի վրայ: Ապա դարձեալ աղօթեց եւ երկինքը անձրեւ տեղաց ու երկիրը իր բերքը տուաւ:

Եղբայրներս, երբ ձեզմէ ոեւէ մէկը ճշմարտութեան ուղիէն մոլորի եւ ուրիշ մը յաջողի զայն վերադարձնել, գիտցէք թէ մեղաւորը իր մուար ճամբէն դարձնողը թէ՛ անոր հոգին մահուանէ կը փրկէ եւ թէ՛ իր բազմաթիւ մեղքերուն թողութիւն կը գտնէ:

**ՅԻՍՈՒՍ ՔՐԻՍՏՈՍԻ ԱԻԵՏԱՐԱՆԷՆ
ԸՍՏ ՂՈՒԿԱՍԻ
4.25-30**

Մեր Տէրը Յիսուս Քրիստոս կ'ըսէ.-

«Զեզի օրինակներով խօսիմ: Իսրայէլի մէջ բազմաթիւ այրիներ կային Եղիայի օրերուն, երբ երեքուկէս տարի երկինքը հանձրեւեց եւ ամբողջ երկրին մէջ սաստիկ սով տիրեց: Բայց Եղիա անոնցմէ ոեւէ մէկուն չղրկուեցաւ, այլ ղրկուեցաւ Սիդոնի մօտիկ Սարեփթա գիւղը բնակող այրի կնոջ մը: Նոյնպէս, Եղիսէ մարգարէի օրերուն Իսրայէլի մէջ բազմաթիւ բորտաներ կային, բայց անոնցմէ ոչ մէկը բժշկուեցաւ, այլ միայն Նէեման անունով ասորի մը»:

Այս ականարկութիւնները լսելով՝ ժողովարանին

մէջ գտնուողները բարկութեամբ լեցուեցան: Ելան, Յիսուսը քաղաքէն դուրս հանեցին եւ գահավէժ ընելու նպատակով զայն տարին մինչեւ կատարը այն լերան, որուն վրայ շինուած էր իրենց քաղաքը: Բայց Յիսուս անոնց մէջէն անցաւ գնաց:

ՍԱՐԿԱԲԱԳԱԿԱՆ ՁԵՌՆԱԴՐՈՒԹԻՒՆ

Ս. Յ.

Կիրակի, 4 Յունիս 2017-ին, Հոգեգալստեան տօնն էր: Ս. Յակոբ Առաջնորդանիստ Մայր Եկեղեցին խոռոհերամ լեցուած էր Ս. Պատարագի սկիզբէն: Յետ Թափօրի շարական՝ «Առաքելոյ աղանոյ»-ի երգեցողութեան, երբ պատարագիչը եղանակեց «Զի ողորմած»ը, երգուեցաւ «Ուրախ լիւր Ս. Եկեղեցի» շարականը: Առաջնորդ սրբազանը՝ Գերշ. Տ. Բաբգէն Արքեպիսկոպոս Թափօրով Ս. Բեմ բարձրացաւ եւ աջակողմին զետեղուած գահին բազմեցաւ: Սարկաւագութեան թեկնածուները՝ Կիսասարկաւագներ Թորոս Պապիկեան, Կարօ Նոյնտեան, Մուրատ Սանոսեան եւ Կորիւն Գոյունեան, որոնք ատենանի յառաջամասին ծունկի եկած էին նախքան «Զի ողորմած»ը, շարականին երգեցողութեան հետեւած



սաղմոսացութեան ատեն՝ Ս. Բեմ բարձրացան, խարտաւիղակութեամբ՝ Արժ. Տ. Հրայր Աւ. Քհնյ. Նիկիոյեանի: Կիսասարկաւագները Ս. Բեմին ձախ կողմը կեցան:

Հովիւը դիմելով Առաջնորդ սրբազանին՝ խնդրեց որ ընծայեալները Սարկաւագ ձեռնադրէ, որովհետեւ անոնք արժանաւոր են այդ կոչման, մաքուր կեանք կ'ապրին եւ խղճամիտ են:

Առաջնորդ սրբազանը ընդունեց վկայութիւնը, եւ Հօր, Որդիին ու Ս. Հոգիին անունով Սարկաւագութեան կոչեց զանոնք, աղերսելով Երկնաւոր Հօր, որ Ան իր Ս. Աջը երկարէ եւ օրհնէ զանոնք նոր կոչմամբ, զօրացնէ զանոնք՝ որպէսզի առաքելի կեանք վարեն, ու միշտ Որդիին գթութեամբ եւ Ս. Հոգիին ճշմարտութեամբ լեցուին, ու ծառայեն Ս. Եկեղեցիին, մինչեւ այն օրը՝ երբ աստուածային Սուրբ Ներկայութեան կանգնելու վախճանական ցնծութիւնը վայելեն:

Ընծայեալները որ Առաջնորդ սրբազանի գահին

առջեւ կիսաբոլոր կազմած էին՝ արեւմուտք դարձան, եւ ծնկաչոք շարժելով դէպի Ս. Բեմին կեդրոն-յառաջամասը՝ իրենց ձեռքերը վեր բարձրացուցին՝ ի նշան չարէն ու աշխարհիկ բարքերէն հրաժարման: Եւ Առաջնորդ սրբազանը Ս. Բեմին կեդրոնը գալով, եւ իր կողքին ու ձայնակից ունենալով Հոգշ. Տ. Վարդան Վրդ. Թաշճեանը, Արժ. Տ. Հրայր Աւ. Քհնյ. Նիկիոյեանը, եւ Հովիւը, 3 անգամ երգեց այնքան ներշնչիչ «Աստուածային եւ երկնաւոր շնորհ»ը եւ իւրաքանչիւր անգամ յանուն հաւատացեալներուն՝ Դպրաց դասին վկայութիւնը լսեց, թէ ընծայեալները արժանի են: Ապա դարձաւ ու բազմեցաւ գահին: Ընծայեալները դարձեալ կիսաբոլոր կազմեցին Առաջնորդ սրբազանին առջեւ, որ աղօթեց եւ խնդրանքներ մատուց Սատուծոյ:

Աղօթքէն ետք, ընծայեալները զոյգ զոյգ կեցան Ս. Բեմին երկու կողմը:

Ս. Պատարագը շարունակուեցաւ մինչեւ «Ողջոյն»ը: Նախքան այդ՝ ընծայեալները վերստին կիսաբոլոր կազմեցին Առաջնորդ սրբազանի գահին



առջեւ: Սրբազանը հրաւիրեց հաւատացեալները, որ սուրբ սիրով ընդունին զանոնք եւ օգնեն ու քաջալերեն անոնց՝ ի փառս Ամենասուրբ Երրորդութեան: Ապա անոնց ձախ դաստակէն առաւ ուրարները եւ ուսերուն դրաւ, պատուիրելով՝ «Յանուն մեր Տիրոջ Յիսուս Քրիստոսի, առէք մաքուր եւ սուրբ այս ուրարները եւ մեղքի բոլոր պատրանքները թօթափեցէ՛ք, որպէսզի Աստուծոյ Ներկայութեան կանգնիք արժանաւորապէս»: Տուաւ Ս. Աւետարանը եւ պատուիրեց, որ զայն շարունակեն կարդալ մեծ երկիւղով՝ ի լուր ժողովուրդին, եւ ի յիշատակ ննջեցելոց: Տուաւ Ս. Սկիհը եւ պատուիրեց, որ զայն մեծ երկիւղով մատուցեն պատարագիչին, որովհետեւ անոր մէջ կ'իջնէ ինքը Աստուած:

Յետ այս պատուէրներուն, ընծայեալները շարունեցան Ս. Բեմին ձախ կողմը: Առաջնորդ սրբազանը կանգնեցաւ Ս. Բեմին մէջտեղը եւ բուրժաւ առնելով՝ անոնցմէ իւրաքաչիւրին տուաւ եւ պատուիրեց, որ Ս. Եկեղեցւոյ մէջ խնկարկելով՝ բուրաւէտեն Տիրոջ տունը: Ընծայեալները մէկ առ մէկ, ըստ կարգի առջեւ եկան ու խնկարկեցին Ս.

Սեղանին եւ ժողովուրդին: Այս պաշտօնէն վերջ, անոնք հաւաքուեցան եւ ծունկի եկան Առաջնորդ սրբազանին առջեւ, որ Ս. Խաչին պահպանութիւնը աղերսող աղօթքը կատարեց: Այն պահուն, Դպրաց դասը երգեց «Ստեփանոս քաղցրիկ տատրակ»ը: Նախքան իր պատգամը՝ Առաջնորդ սրբազանը ուրար տուաւ դպիր Կարէն Նաճարեանին:

Իր պատգամով՝ ան հրաւիրեց ընծայեալները, որ Ս. Եկեղեցւոյ ծառայեն քաջաբար եւ նախանձախնդրութեամբ՝ նման Նախասարկաւազ ու Նախավկայ Ս. Ստեփանոսի:

Թէ՛ սարկաւազները եւ թէ՛ ուրարակիրը կանոնաւորաբար փորձերու հետեւած էին Արժ. Տ. Հրայր Աւ. Քհնյ. Նիկոլեանի հետ՝ անհրաժեշտ գիտելիքներ իւրացնելով: Տակաւին պիտի հետեւին՝ որովհետեւ ընդարձակ է ասպարէզը:

Հոգեգալստեան տօնին կատարուած Ձեռնադրութիւնը եւ ուրարի տըւհութիւնը՝ Ս. Յակոբ Առաջ. Մայր եկեղեցին առաւել պայծառացուցին եւ պիտի պայծառացնեն:

ԱՅԵԼԵՅԷ՛Ր ԵԿԵՂԵՇՈՅԱ ԴԻԱՏԵՏՐԻ ԷՐԸ

ԵՒ ՁԵՐ ՀԱՄԱՆՈՒԹԻՒՆԸ յԱՅՏԵՅԷՐ (like).

www.facebook.com/SourpHagopChurchMontreal